

L' universal erede	
A sarà la mia crica,	
Pr l' amicissia antica,	
L' è 'l manch ch' i peussa fè ;	2
Con pat, ch' an compania	
Tut vada a l' ostarìa,	
Fin ch' ai sia un doidnè.	2
Ch' a m' scrivo con d' vin sul marmo	
Coust epitafi an stampa :	
L' è si slongà ant la tampa	
Coul pover Giaco Tros ;	2
Prchè ch' una sola vota,	
An leu d' andè giù an crota,	
L' è andait a beive al pos.	2
Piè tuit da mi l' esempi	
A beive mai nen d' eva,	
Prchè l' è roba greva,	
Ch' a fa marsè 'l pansat ;	2
Mandela a 'la malora	
S' i veule nen ancora	
Tirè vostr ultim pat.	2

Lamenti di due Serve contro le loro
Padrone.

CANZONE XXVI.

Bondi Margot, com' vala,
 Aidemi ch' i t' ses splufria,
 Aidemi ch' i t' ses splufria,
 I t' smie giust surtia
 Ancheui dal lasarat,
 Dal lasarat ;

T' as peui cativa cera,
 T' ses del color dla tera,
 E tra 'l color dij pat,
 Color dij pat.

O cara mia Slufrinna,
 E com' mai veustu ch' j' abia 2
 Fra tanta bile e rabia
 Color e sanità,
 E sanità?

T' sas bin ch' j' eu una padronna
 Ch' a l' è la pi stangonna
 Ch' ai sia ant la sità,
 Ant la sità.

Oh! tas ampò bagianna,
 Lasme parlè dla mia, 2
 Ch' a j' è nen la paria
 Lontan da coust pais,
 Da coust pais;
 Coula l' è una scaramana,
 Ch' a m' fa mangè pr mana
 I trous e j' euv covis.
 E j' euv covis.

E 'l pan mufi ch' mi mangio,
 Peui ancora con misura, 2
 E con la crosta dura,
 Ch' ij can lo veulo gnanch,
 Lo veulo gnanch;
 Loli si ch' a m' fa arionda,
 Ch' i resto senza sponda
 Pr tni i cotin sui fianch,
 I cotin sui fianch.

La mia veul ch' i fassa 2
 La mnestra e la pitansa,
 Con pat però ch' j' avansa
 La sal e 'l condiment,

- E 'l condiment;
 Pr vive d'sa manera,
 I peus andè a quaich fera
 Pi prest a vende i dent,
 A vende i dent.
- A l'è poch manch dla mia,
 Ch'a l'è da rair ch'a m'passa 2
 O bur, o lard, o grassa
 Pr fè quaich potagiat,
 Quaich potagiat;
 Disend che l'oitum a guasta,
 E che 'l breu sol a basta
 Pr tuit i meinagiat,
 I meinagiat.
- J'eu bel fè economia,
 Tant a m'armogna ancora, 2
 Ch'i veui butè an malora
 E d'ram e d'reis la cà,
 E d'reis la cà.
 S'a m'sauta un di la veuja,
 Mi pianto li sta pleuja
 Com'un bech al marcà,
 Bech al marcà.
- Sta tigna a m'fa tavota
 Mach beive d'vin d'lambrosca, 2
 Ch'a l'è nè asil, nè posca,
 Gnanch bon a lavè i pè,
 A lavè i pè;
 Peui ancora ch'a m'na deissa
 Pr past tant ch'i podeissa
 Leveme almanch la sè,
 Almanch la sè.
- Pensrastu fors ch' mi beiva
 D'vin grech o d'malvasia? 2
 S'i t'veule ch'i t'la dia,

- A m' fa beive al lapat,
 Beive al lapat;
 Quand l' ha la lunna bonna,
 Anlora st' avaronna
 A m' dà coul del concat,
 Coul del concat.
- Ma scota s' a s' peul desse
 Una pi gran tignassa, 2
 A veul ch' una ramassa
 Dura neuv o des agn,
 Neuv o des agn.
 Pr chila j' operari
 A peulo andè pr giari,
 S' a speto un dnè d' guadagn,
 Un dnè d' guadagn.
- E mi ch' ogn' an a m' passa
 (Scota sta sì ch' l' è bela), 2
 'Tre sold pr d' rasparella,
 E ses amboste d' bran,
 Amboste d' bran;
 E veul ch' i piat a luso,
 Le siete e tond brluso
 Dal prim a l' ultim pian,
 A l' ultim pian.
- S' i venno a rompe un asi,
 Gara al me poch salari, 2
 A n' ha da portene 'l cari,
 Senza gnunne remission,
 Gnunne remission;
 S' a fus bin ch' una gnìa
 Strusà, e già scrussia,
 Tut va pagà pr bon,
 Pagà pr bon.
- E mi versand quaich gossa
 O d' euli, o d' vin, o d' bagna, 2
 A cria pi ch' la cagna,

Quand ai ven d' forestè,
 Ven d' forestè;
 Ausand coula ganassa,
 A s' fa senti d' an piassa,
 Ohimi che brut mestè,
 Che brut mestè!

A l'è ferià ch' i fassa
 Giamai un toch d' marena, 2
 E venta ch' i desprennda
 A fè dcò colassion,
 Dco colassion;
 Figurte ampè s' a venta
 Che a poch a poch i dventa
 Grassa com' un piston,
 Com' un piston.

E mi, a l'è poch a di, ch' a m' conta
 Tuti i bocon an boca, 2
 Oh! loli si ch' a m' ancioca,
 E con tuta rason,
 Tuta rason;
 Anlora mi sbatria
 Pr rabia e bisaria
 Tut quant ant un canton,
 Ant un canton.

A j'è pa mai gnun privo
 Ch' a m' lassa ampò na vota 2
 Andè giù sola an crota,
 Ma con quaich sort d' ambreui,
 Quaich sort d' ambreui;
 D' un fieul o d' una fia,
 Ch' a son d' rascassaria,
 Ch' a m' guerno a vista d' eui,
 A vista d' eui.

Pr mi lo peus giurelo
 Senza parlè con finta, 2

Da peui ch' i son li drinta,
 Ch' j' eu mai fait un bon past,
 Fait un bon past;
 Ansi a m' fa fè una vita,
 Ch' i stanto tnime drita
 Portand e 'l cari, e 'l bast,
 E 'l cari, e 'l bast.

S' ai ven quaichun a vedme,
 L' è subit sospetosa, 2
 A m' fa una cera afrosa,
 Ch' a s' peul pa disse d' pi,
 Pa disse d' pi;
 Prchè l' ha sparm ch' i pia
 Quaicoşa pr dé via,
 Quand' ai n' è gnanch pr mi,
 N' è gnanch pr mi.

S' i vad scusè quaicoşa,
 Povrina mi, Dio guarda! 2
 S' a s' dà marlait ch' i tarda,
 A m' smon finna d' barà,
 Finna d' barà;
 E scota gnunne scuse,
 Disend ch' a son mach d' ruse,
 Ch' i vad studiand pr strà,
 Studiand pr strà.

Mi m' treuvo tant sogeta
 Con coula mesa testa, 2
 Ch' a m' lassa gnanca d' festa
 Surti marlait a spas,
 Marlait a spas;
 Son pes ch' un sciav d' galera;
 Pensa ampò d' che manera
 A m' fa rusiè 'l cadnas,
 Rusiè 'l cadnas.

Mi son sempre bacioca

- Talment com' a m' sequestra, 2
 S' a m' ved mach a la finestra
 I soma a tartre e guai,
 A tartre e guai;
 L' è pa pr tema ch' l' aria
 A m' peussa esse contraria,
 Loli ai fa pa sgiai,
 Ai fa pa sgiai.
- La mia, mësura chila
 E 'l gran, e la fërsaja; 2
 A l' è bin esse tnaja
 Pr nen paghè quaicun,
 Paghè quaicun;
 O forse pr pagura
 D' esse anganà dla mësura,
 Prchè ch' a s' fida d' gnun,
 Ch' a s' fida d' gnun.
- A lo fa pa la mia,
 Ch' a l' ha gnune cassine, 2
 A cata a mese mine
 Coul gran ch' a l' è pi rancian,
 Ch' a l' è pi rancian;
 A tira al pi bon pressi
 Pr spende pochi bessi,
 E fè ch' i mangio pian,
 Ch' i mangio pian.
- Ciamand 'l me salari,
 Oh che bruta gabela, 2
 O pr di mei ratela!
 A m' serca 'l peil ant l' euv,
 'L peil ant l' euv;
 S' ataca a mila ronse,
 Prchè tratandse d' monse,
 A j' è pa vaire d' neuve,
 Pa vaire d' neuve.

- Ma ch' a m' dovria deme
 Ogn' an una camisa, 2
 Prchè ch' a m' l' ha promisa,
 Ansem a doi faudai,
 A doi faudai;
 Ma j' eu ancor por ch' a m' daga
 Nè lon, nè gnanchi la paga,
 E ch' i saroma a guai,
 Saroma a guai.
- Ma s' i veuleis descòre
 A m' manca pa d' materia 2
 Dla pi massissa e seria
 Da di sui seu andament,
 Sui seu andament;
 Basta, i veui pa buteme
 An andi pr scaudeme
 Su coust recitament,
 Recitament.
- I na seu pro quaicuna
 Dco mi dla mia patronna, 2
 E pur a fè la spionna
 I peus mi stene d' mes,
 Mi stene d' mes;
 Ma 'l servitor na conta,
 Disend ch' la rabia ai monta
 Giumai d' andeje apres,
 D' andeje apres.
- Quand 'l padron l' è fora.
 Anlora i seu compare 2
 A venno con d' comare
 Ansem a d' atri amis,
 A d' atri amis;
 E peui sarà ant la stansa,
 A mangio a cherpa pansa,
 E mi m' leco i barbis,
 Leco i barbis.

Oh via là mi t' lasso ,
 Margot, fame coragi, 2
 Arvedse un autr viaggi,
 I m' peus pa pi fermè,
 Pa pi fermè;
 Tra tant i son ant coula,
 Ch' i veui dè un caus a l' oula
 Pr nen stè li a cherpè,
 Stè li a cherpè.
 Pr mi n' a stagh pi gnanca,
 Ch' a l' è d' autut trop croja, 2
 I veui mandela al boja
 Con so bel umorat,
 Bel umorat;
 E tute ste patronne
 Son triste e sfrontadonne,
 Ch' a vado ampò al folat,
 Ampò al folat.

**Sfogo lamentevole di Gervasio abbandonato
 dalla sua Biasina.**

CANZONE XXVII.

Che sfortunassa maledeta,
 Ch' a m' fa giamai virè 'l servel!
 I l' eu pi nen un' ora chieta,
 A l' è una roba da cotel.
 Coula Biasinna tant crudela
 A l' è la causa del me mal,
 (Oh ch' a m' ven caud a nominela!)
 A m' stima giust com' 'n stival.